

國朝駢體正宗續編

國朝駢體正宗續編卷七目錄

吳慎菴先生地理便覽序

孫希彭師竹廬詩集序

方彥聞先生隸書楹帖跋

先賢吳學士祠版文

戶部主事季穎呂君哀誄

與朱薌孫書

華山雲臺觀崇真翊教之碑

誥幽魄文

沈竹虛亦廬詩序

王叔彝觀察詒安堂詩三集序

重修浦江仙華山竹林寺昭靈宮碑

答施均父書

書熊廷弼傳後

與張玉珊書

周存伯范湖草堂圖序

陳圓圓小影圖序

國朝駢體正宗續編卷七目錄

國朝駢體正宗續編卷七

嘉興張鳴珂公束輯

吳慎菴先生地理便覽序

洪麟孫

嘗讀漢書藝文志形法類見其辨聲氣之隱真論物象之終始以爲堪輿家言已懸緒於茲矣然玄奧雖興牒錄未兆及瀏覽載籍則庚泥述於敬仲已肇蒼姬坤鄉紀於華陽謂由苻緯武庫之驗樗里預知鱸市之占延壽悉聞水妃肇武於新室生尅之說先興土禁陳疏於王男避忌之端聿起則知其緒夙隱實兆西京而緯候之中伎數之士遂引楯其萌始云厥後條流騰踊圖籙鱗萃約其蔽痼亦有數焉夫宅兆有卜上聖宣之於彝經體魄所藏神明憑

之爲元舍然羸博之瘞觀者僅論其廣輪防斧之形曩哲  
聿詳其規度未有廣搜沈奧始肇元堂者也使必白馬經  
途燕頷之祥始兆石蛇遺卵龍韜之略聿開則雲氣五色  
元旒所以應蒼符祥桑一叢黃祗所以表崇德悉皆元命  
之式憑豈緣幽窆而獲祐而必以恆幹之埋藏冀蒼靈之  
禔福何異祝甌窶於蹄酌求罔象於驪淵此卜藏以求祐  
者惑一也至若仲任有言盛牝多理楊泉著論皋陸十形  
石骨川脈地絡之辨堪徵弓弩斗升類象之方互舛然特  
曠稽墳衍非必刻擬一隅也使謂山列八字本州之朱節  
徵凶溪繞銅官桂林之■枝擢穎則形類雞棲詎必麗丹  
書而湛族兆徵龍耳亦僅聆口敕於經圖今乃執一坏之

荒壤徵十箭之詭稱峽嶂低聳卽擬鍾阜之龍蟠  
窺遂駭秦疆之鳥負此則騁彼游談旣循迹而索履證之  
曩說亦搜劍而缺舟是按籍以求穴者惑二也況乎榮古  
者近誣膠前者必懵馳術之子旣躋駁而出規炫世之書  
更稠疊而繁理如必鑽礪往牒以冀悟領則羣喙颯駭聚  
雜鮮衷仰稽篇條或出七錄所載之外詳參年祀反在秦  
坑未燔以前眇技所嘗必竊號於文成里豎所編遂假寵  
於蜀相欲枿窳榘夔曠亦窮其元律思刷牖戶離朱且炫  
其青臚此所以通儒熾其深暇有識措其隱譎也乃必攀  
條引蔓援遐例今陳隧未啟必證名景純之篇荒埏乍臨  
遂乞靈玉函之牘圖曩賢之冢墓奉爲祖禰執晚近之空

室摹形古初前既識十而遺五後乃剝圓而就方此則闢  
闢削刃亦仿姬宗之容刀鯁生樹礎必效岐陽之樂石是  
泥古者惑三也他若典本飾終固粟菽而無異事由跬步  
近倉睫而不滑雖荷鍤便埋爲狂士之寓言而委土卽化  
亦聖賢之達節使必賤同矯羣鑿智竅臆則泥稚川生地  
之篇二車必磨判其夷險踵潛夫商宅之論半扉亦鑿辨  
其東西是則崇班未列叔子之墓道已殘壯氣尙虛杜固  
之隧阡先裂矣今乃近斥安途越險而謀穹隧詭移幽寢  
播遷以震冥神遂至歸骸道闊預罄私藏之錢刀誓墓途  
遐竟缺末孫之雞酒此則元紀壓泉已基妖禁之陋公輸  
機封未免嘗巧之譏是好奇者惑四也總究羣倫盡同茲

弊擴清繁詭每難其人此慎菴先生地理便覽一書所以  
作乎先生鄉邦遺獻儒林丈人覃思契神博識邁往於好  
學脩古之暇尤加意於占墓之術加以沈鬱達源剔範通  
于三古經緯包遠閱歷半乎九垓故於地脈之起伏水泉  
之向背莫不鑿矚洞明通變萬有乃作是書以總蒼元旨  
貫一拯亂固已集斯緒之大成視前哲而獨秀矣先生不  
揣譎昧授簡餽生雜誦之下服膺勿替遂附曠牘一映贊  
言他日者南陽術學編戶共置其韋編記室葬經童律皆  
通其緒義非特藝術之偉業實禮終之鉅式也



孫希彭師竹廬詩集序

洪麟孫

丙戌初秋余以試事薄游澄江遇孫君希彭於李先生兆  
洛座上對影竟日彌稱古歡由是訂交迄今十稔兩人情  
好覺言語不能殫述也蓋余先人與尊甫觀察公爲道義  
交至老靡閒王貢入官海內播其節概李杜合傳青史著  
其芳聲餘風所留被及再世岑古苔合蘭遺室馨宜其結  
契之摯也然僕於此竊有感焉蓋先人之與尊甫也幼同  
恆聞長同客游厥後又同官禁近松檜並植不越乎崇巖  
鸞皇所游同樂乎瀛閩黃墟之酒共斟游山之屐互蠟說  
母宵半隔野燐而對眠閉關且初卻俗儔而命翰故枕鄰  
嚙語通之以夢魂結交成詞誓之以生死是宜言愜襟靈

音和牙曠也若余與希彭則一守故邱一僑白下生年二十雁鶩之贄未通川途百里爰居之巢各判計自擇交伊始摟指今晨一觴一詠無竟日之唱酬載笑載言少一句之晤對瀟瀟風雨懷故人而不來慘慘河梁望行塵而已遠蹤迹可謂疏矣然而貞松穴巖已具悅柏之意繁霜零野能愜鳴鐘之期寸心不移千里如面桐魚來而浮磬響商颿煽而金芝生行雲在天蘇李則喻比雙鵠壯志如日現逃則舞應晨雞氣誼之真無慙在昔矣至若先人之與尊甫也方踰壯年盛名在世聞李膺之至薨豎皆知見司馬之詞公卿動色戶讀陳留之冊縑圖洗馬之容固不獨名位之爲奕也今者君逾三紀僕有二毛鉢盂之詞已成

等身之書僅讀號鐘暗響無異於積銅明鏡覆卮空慙於  
頑鐵名不越里巷祿不逮斗升彈鋏無孟嘗之知命駕少  
當時之驛寥落寡偶奇寒偏人醒酒之石屢移於強宗晏  
嬰之裘久質於市肆竄梁鴻之廡見欺里魁問寢邱之田  
或侵豪右西華之帔空曳北郭之薪不售短歌易瘖長劍  
何用中年哀樂過謝太傅之聞絃身世浮沈同江文通之  
賦恨斯何故哉亦云怨矣矧乎僕已倦游君將遠適家徒  
四壁道長半生車轍誤於西東浮雲鬱乎南北人百其感  
路涉以千臨觴有悲稅駕無所聽趙瑟而填膺蘭生髮指  
眺荆樓而橫涕王粲悲來更可謂悽愴感懷者矣雖然離  
合者遇也榮悴者時也名儒之代代興者幾世四海之士

相知者幾人中壘之後或希進於權門吳札之賢且求友於上國吾兩人者少承崇基夙有瓌抱上不爲負圓毀方以冀詭遇下亦思砥節礪行無忝所生則忍飢堅讀不乏鑿楹之篇斷金而來尙有同術之子由是進窺盱眙外閔世變一室雖小可攬八荒寸睫甚微能燭萬古星宿一勺過流沙而騰天泰山片雲乘元螭而作雨陳登湖海之氣其在斯乎豫州廓清之懷此行是矣否則抽妍騁祕引宮刻商跌宕崔蔡之場詆訶江鮑之作喝海若使西馳掣羲御使東走振衣嵩少而星斗四垂張樂洞庭而魚龍百變則此一編是其嗃矢也君將遠適聊爲繞朝贈策之詞僕復奚言願效張華勵志之作是爲序

方彥聞先生隸書楹帖跋

洪齋孫

右隸書楹帖十四字大興方彥聞先生遺墨也先生沒後五年長君元徵持示齋孫并索跋語先生著述等身文辭冠代書翰特其餘事耳然猶足上肩漢魏下掩諸家固當世所共識者也而齋孫所以執簡悲來者則又有故焉蓋戊子春閒辱君知遇得附末交先生已位隆繁赤名滿士林李膺入座望者比之爲神仙退之成文讀者仰之如泰岱而齋孫則戢影窮檐儕身傭保比屋之士不聞其姓名一畝之宮久蔽夫蓬藿又無平昔之雅半刺之投可謂蹤迹遼闊者矣乃蒙虛襟下交廣爲延譽幅巾而訪窮巷削牘而賞小文過冀北之野轉盼千金得汝南之評迴春一

語緬茲古契有加曩賢方冀後車同載學海常探共保始  
終並騁才力豈圖一官遠方尺波電謝送西陵而長往招  
南鴻而不來范巨卿之車馬空赴江干王子猷之竹林僅  
餘故宅天高莫問理不佑夫善人魂迴難招酒空澆夫坏  
土哀矣怨矣嗟乎士感知己物貴同情捐荼茹蒿者必無  
羨於豹胎棄璠拾礫者必不珍夫荆璞般旋盛僕或見嗤  
於裸俗繩墨巧匠每遭忌於曲株故離光非燧人不熾楚  
金非歐冶不剡沈閭在握須明砥以斂鋒玳華出巖仰磻  
磻以暴采乃浮磬欲振而銅魚已枯寒鐘欲鳴而元霜俄  
散馥馥設而夔曠亡黼黻陳而離朱逝子敬有亡琴之嘅  
伯牙抱絕軫之悲人非草木其堪此乎今者零落遺縑英

華稀絕銚昏暗壁紙慘生皴追維曩昔命儔歎侶拔藻傳  
觴墨濡首而淋漓刃摩天而誅蕩讀大謝之作水木生暉  
展小李之詞觚稜煥采此一時也何其盛歟孰期款款生  
平尙憶雪泥之鴻爪而茫茫異路空留破櫝之蟬篇鶴歸  
國以何年豹留皮而僅在西州之慟太傅無間幽明北海  
之見虎賁宛然心目典型之作其在斯乎所幸者蘇瓌有  
子鮑照能文守此零編綿其手澤然而蓬蒿三徑尙假他  
人琳瑯百函未付削氏拜北堂之尊老嗚咽商顏遇東郭  
之遺孤淒涼秦贅又當覩此而泣然也敬瞻楮墨聊志微  
忱幾字空存九原可作庶使拜徐君之墓孤劒同懸答劉  
沼之書神明若接耳

先賢吳學士祠版文

洪齟孫

吾鄉靈粹鍾異名賢代生然以直諫顯者里乘闕寂自道鄉著讜議於宋廷學士建光節於明葉遼闊千載華嵩並峙可見骨鯁之臣尤往哲所罕觀者也蓋烈士不惜其踵頂固能蹈鼎鑊而如飴賢者不拘泥於小義乃克顯正氣於宇宙故履忠作孝者不顧瓌瓌之世議抗志求仁者惟知嶽嶽之大節也然而神鷗搏海難辭尺鷃之譏豫章翳天每罹掘閱之憾睢陽偉烈史臣不無微詞武鄉盡臣崔浩加以目論若公之大節則尤可言焉公固江陵相門下士迨江陵以奪情起復公上疏斥之當時所謂六君子也論者謂魏倩登進賴鄉侯爲先游黃霸入官實夏侯爲口



薦江陵公之座師也漢廷賢杰每爲舉主而服喪第五曲躬必對鄭宏而致禮在三之義鉅典攸關公乃忘卵翼之舊恩作鴟狼之反噬是袁氏樹恩未收穫稷之報臣僕仕衛先排文子之疵未免崔羣報怨竟同陸氏之荒莊卽令弄罪貫盈何得礪逢蒙之鳴鏃不知匪躬而建讜節者公誼也拔擢而感知遇者私恩也江陵而不麗大慝卽挂彈章公之背德也江陵以固位遺親得罪名教公不可不言也君子愛人不以姑息爲德君父有過自可號泣而言況詳厥疏奏究厥旨歸固止曲望其奔喪未忍顯揭其隱慝安得罔隨羣議卽肆詆謏乎說者又謂公以春官之桃李傍董相之門牆何妨徑造東堂陳言前席則彭宣帳後自

可片語而轉圜詎必廣德免冠發狂言以激忿乎不知孔  
光固位惟有熱衷吳起絕裾已無至性方結黃門之媼相  
涕泣留賢通白簡之庸臣飛章借寇朱雲下殿知爲張禹  
而鳴威執友入言則效侯嬴而刎頸而謂能以造膝之一  
言解柄而歸田乎公之明哲固深鑒其隱衷矣未解斯言  
從何鼓吻也至謂江陵相業大造明邦漢得子孟是以中  
興晉有謝安居然再造是以王尊叱馭益顯公忠子文毀  
家方舒國難卽其有玷於彝常要自無關於民社如茲曲  
說更屬謬悠夫阿衡佐亳不聞生自空桑申生有言天下  
誰無父母未有行負神明而克樹偉鉅者也且或當龍髯  
墮弓之日鳳宸委裘之年龜鼎未安或堪藉口今萬曆紀

年已十餘載矣春秋鼎盛帝非六尺之孤童聖慈垂簾上  
有西岐之文母則金甌無缺坐鎮無藉於姬文玉弩不驚  
往制難援夫兵革而乃骨肉未安黃扉高坐冠禮則朱戟  
垂紳大婚則彤裳班位沐浴佩玉祁子見之而傷心食稻  
衣錦宰我安之而若素誰非人子而忍爲是言乎又謂當  
江陵之奪情也眾正盈朝諫章鱗萃艾穆旣抗聲於殿陛  
鄒趙復接武於青蒲公卽緘默大義亦伸嗚呼列星麗天  
不因圓靈而斂采五音合樂不緣金奏而噤聲使謂蹇蹇  
直節志士甘以後人諤諤滿庭庸臣不妨卷舌是有微箕  
之抗義墨胎卽不必餐薇有袁粲之死忠褚淵自可以屈  
節此固洪選之膺肺非賢者之所爲也至謂江陵戀棧居

寵而忘親延陵殉名背師而沽直揆之名義厥戾維均則  
又不然江陵挾闔尹以震主卻苦寢而固榮歎死父於九  
京非瀝肝於王室有慙子鵠兼愧相箴矣公則委曲求全  
純衷自表以爲委蛇非所以事主曲附非所以報命必挈  
魁柄以歸黼座則主威尊矣感烏傷以植人紀則師誼盡  
矣且夫蓋臣之戴主也以全國體爲大君子之報德也以  
勛至行爲先使江陵當日卽撫膺悔悟灑泣奔喪則識機  
而退必不效主父之逆施大慝未彰何至糾王光之黯黷  
是大節純矣博陸驂乘必無芒刺之嫌蕭生乞骸豈罹狂  
狴之慘是知遇全矣且使君臣交契謗書不行則純忠篆  
碑詎致鴟詩之毀室模金範象何傷烏喙之寡恩是國家

亦無遺議矣嗚呼公所以感悟聖聰者至焉公所以酬德師門者隆焉故難格者神祇也公則精誠冥通幽感斯應廷杖之日迅雷般空庶女排闥寒霜滲乎燕郊烈士播詞陰雲解乎衡岳公之忠可知矣不測者君威也公則諠言沃心宸旒寤合斥逐未幾旋復召用折檻永存漢帝爲之動色良近引喻英辟因而霽威公之忠可知矣至難愜者庶類也公則聲播寰宇孺婦感泣玉墀有贈寮采服其剛腸遺疏殺青頑懦讀而奮立公之忠又可知矣豈謂誠可以貫天日而不能懾含生信可以格九重而無以愜庶士志可以白萬古而莫逃里儒之刻繩此所以決背而嘆息者乎道光十一年公裔孫敬承將新家廟授簡齋孫以銘

祠版齟孫直臣之後也昔先府君未遇時曾與袁太史枚  
論公忠節往復數書後以違例上書受知

聖代論者謂當時辨論有深契焉惜集中失編其文久佚  
故於敬承之請詳備書之以告後世焉嗟乎一目之論難  
馳域外之觀志義常伸永作山河之氣論公者可以思矣

戶部主事季穎呂君哀誄

洪齟孫

呂君諱振騏字季穎號絨三道光六年進士候補戶部雲南司主事常州陽湖人也以道光十三年十二月初一日卒年僅三十有六嗚呼哀哉山雲攜華荆璞遽毀豫柏挺秀列颯驟摧薄宦甫營山邱旋動入室而視惟存敝冠闔棺而號尙有老母孤兒三尺烏離轂而頽巢千里一棺狐首邱而無日是可傷矣君裔出東萊望重南國代有隱德楹藏斷編劬學篤于繩樞慧心出于髻齒寢挾鉛槧穿幼安之藜牀口弊典墳從夏統於柶圃蓋貧不廢業故飽糠覈而亦甘敏且虛盅雖抱琬琳而自晦哲昂伯翔孝廉瓌瑋博達當世傾襟君旣得其師承益闢奧窔質疑義于璣

璣騰茂實於機雲二龍籀雲萬馬禁響故能囊括百氏笙簧六籍纂漢儒之微言精祭酒之訓詁義爰探祕埽輔嗣之空談麟鼓搜奇補陸璣之漏簡其沈思博識雖孝廉君亦自謂不逮也少有至性內行淳嘉十齡失怙廢蓼莪之一篇廿載養親少黍稷之百晦然藜藿自厭甘毳必供茅容捧膳碩友見而心傾石建浣裙臧獲聞而感泣至其敬事諸兄更推友愛聯牀聽雨驗大被之奇溫隔牖聞聲飭衣帽而始答候伯淳于講席赤日盈途送玉局而出郊青纓濯淚其孝弟有人所難及者矣逮夫文戰屢捷魏科早登以通博之才與曹郎之選雲南司綜核天下財用鉤稽繁劇君匆匆如畏翬翬竭忠文案自環卒牘無滯每見有



不合往往力爭篝鐙五夜人知李遜之功勤入座一言羣  
攝蕭生之膽氣雖不克見其設施而居官之勤恪可知矣  
嗚呼以君之經術湛深志行高邁家修則德媿曾閔服官  
則勞同邵纘上交有抗志之風退處無矯俗之意使得假  
以遐年錫之隆遇所當顯絕特之梗概副知交之厚期者  
也何期逸翻乍張中道徂謝攬轡欲騁而驥驟之步俄停  
含香甫膺而蘭茝之華蚤落嘻其酷矣而況綜厥生平所  
遭坎壈其爲悽愴傷心者又有更僕難終者乎蓋當其少  
也乾蔭早傾蓬華自守夜有續鐙之帶晨無越宿之糧披  
東里之葛衣懸鶉致譙貨西秦之柳畚拘蟻供親希文晝  
粥日止一餐長卿還里室惟四壁其可悲者一也及其壯

也瑣尾關河竄迹廡下學雁臣之寄羽悲馬首之嘶風山  
郵酒罷莫燭愁來畫堂擊筑誰悲傭客之銷魂晨月登樓  
橫覽大荒而隕涕江岸浮梗逐萍波而不返京臺冤禽聞  
絃聲而自怯其可悲者二也當其置身霄漢垂光雲蜺共  
謂王陽入仕望魏闕而彈冠武子立朝布金錢而匝地孰  
知鶴俸雖叨牛衣仍臥度支一官手縮海宇之財賦薄宦  
八載廚鮮繼日之樵蘇范史結廬居鄰馬磨望之勵節崎  
若雞棲況乎然諾不欺推解恐後益無儲粟待以舉火者  
數家鎿有剩膏借其餘光者徹曙故至晏嬰裘敝趨朝則  
風露增寒桓子琴張故里則田園久廢其可悲者三也逮  
至夢徵集鵬歲識在蛇雞骨支牀鶴原握別蘇韶永訣恐

遺櫬之遲歸李賀彌留念阿嬰之已老乞餘齡以將母九天之呼籲莫聞痛襁褓之遺孤三月之咳名未命嗟乎蕭寺魂羈家山路遠空隸頭銜于尺旒未歸恆幹于泉塗京華旅殯臥白骨而生悲長夜思歸瘞玉棺而無地其可悲者四也齟孫與君交深杵臼誼託葭莩應瑒拔藻久結隊於敦槃向生重來已哀感夫鄰笛而哲晷復以誄言見屬遂得表茲素履用綴元旒嗚呼虞歌執紼慟元伯之有靈寶劍遺阡弔徐君而屑地迴車三步好營雞酒于他年遺藁一函爲發蟬篇于此日誄曰

猗與呂君力敦志節價重璠璣德光前哲曾不中壽殲我喆人崑邱碎璧凌門落鱗我初識君歲在乙酉君登賢書

我耕隴畝握手翩然惠休之室片語定交如舊相識白露  
未晞秋琴始張牽襪讀畫子歌我觴素心兩三雲溪一曲  
布帆若飛其人如玉歲聿云莫寒風襲裾子攜百錢飲我  
城隅朗月不來詩袂乍舉狂談相答室忘其主春波畫舫  
送君衡門離瑟慘臆林花悅魂自茲一別死生契闊萍蓬  
各飄風雨墜翼聞君拔藻九萬圖南俯首狂喜貽君一函  
雲泥已分思見顏色山河迢迢不我能卽聞君惡耗時客  
汴州爲位而哭淚縷盈眸泊余入都時維夏杪登君之堂  
人琴俱杳敬問君母進謁哲昆門可羅雀親仍食貧遺文  
在笥遺孤在抱倦念疇昔憂心如擣傷哉伯鸞未返桐棺  
秋風夜起漆鐙穗寒我已脂車將歸故苑君其有知偕余

南反深疊淺學有酒如澠雲車風馬魂其式憑精爽或通  
歡然道故勿以戢景謂余不覩偉文碩行舉世共推書君  
渠範以貽後來

與朱薊孫書

顧壽楨

薊孫足下驪駒在路忽忽送君縈我夢思窮彼指喻繼此  
旬日僕亦戒途侵晨未興窗撼聒耳曳衣起坐雪光到門  
行李旣命不可阻遏遂乃奉母浩然東征街市寂寂泥淖  
窘步甫出郊外寒風伺人雲影慘淡天際若織飛翼狂墮  
愁舞不休盤旋著衣玲瓏簇素細響瑟瑟須臾滿懷重裘  
若褫時自驚顧噓氣于口偏不得出兩夫曳轎破風狂奔  
力竭而喘鷁退逾咫尺野亭招客乃登灞橋凭闌縱觀奇趣  
橫發枯荷半僵與水相拘新柳怒茁闕寒不青遠山黯黯  
而失華流澌澌澌而帶翌策驢斷岸之上尋詩孤館之外  
昔有其事今無其才暮抵新豐若歸於家鑪光送紅遙見

色喜引體相就乃更戰栗土牀一盤擁被蟄臥酣夢驚覺  
憂懷轉滋遠念足下危閣替路垂巖進蹤迢迢諭母子子  
孤往千里之隔陰霽倘同此日之威慘懷奚禦雲氣撲棧  
平旋作花陰崖挂凌紛滴若雷峯峭阻客澗迴失途嗟乎  
嗟乎王陽稱孝迴車絕險今圖返櫬揮手竟過當此之時  
能無痛心諒容槁於凍霧淚灑於積雪者矣僕已於二十  
六日稅駕潼關家君無恙轉見慰問小齋如艇尙可皮書  
未審足下今復安屆計劍峯已度瀘水非遙輒用寄書上  
承動靜所冀揮憂奉餽卜日治裝春鯉方東有以遺我

華山雲臺觀崇真翊教之碑

顧壽楨

若夫靈根代嬗園穹開父父之元道轍紛殊柔位貢師師之象引而窮部算放而際絃埏莫不胎精耀于三分頽豪釐于九達是以專門奧據無慙首穴之仁歧道旁參用發心都之嘆至若絳衣北拜恢授受于犀顏黃氎南來慎支離于牛迹亦各因宗以衍化守軌以凝真豈有眾妙元基混成至教挺淵兮而樹極控緜若而存神顧可昧大統于真源縱交馳于常道者乎雲臺觀者方外之貞庭焄中之靖宇也瞻茲法友共託于權承希彼真僊宜歸于賴畫爰昭定矩用諭方來庶開抑抑之衷共邁存存之域粵自雞丸剖蓋鴻烝甄羅天精舒元始之胎石血演剛須之脈京



輝玉飾排六劫而開真澗發瑜姿協雙儀而孕妙樞墟東  
闕三聖旋孽桐嶽西騫九光遂絕固以瓔房蓄翠獨斟萬  
化之元瑤屋飛香綜擘羣僊之籍迨夫赤綠神遇碧盧烝  
通展九翼于平初炳十華于望獲爰別初中之紀洪垂三  
一之經鏗馬蹏而定辰洮龍驅而叶谷至乃元景延和之  
世清虛康泰之年桓芝降神際中皇之盛秣長桑蛻骨實  
赤明之偉朝龍劫恆旋鳳文稍祕雖金書耀彩頻垂八角  
之芒而玉簡鈎沈惟餘九頭之冊于嗟篋矣莫得詳焉亡  
何星震狼杓天開龍漢百千萬劫仰聃耳以恢宗七十二  
年剖洪胞而定命總天人之會脩真樸之源神王于以歸  
墟大道茲焉託極爾乃九名九變能牝能孩蘊妙有而常

凝葆和光而代見通元肇蹟于象符之世宛華抗禮于龜  
瑞之君下逮柱史之官猶彰郭叔之字於虜陰滿魄徙日  
中焚遷標東別于岷源流斯玉壘迤南支于崑幹嶽總金  
方于是拱北藏精建南遁曜法輪遐轉方開覺路于空幡  
石室虔咨早衍真符于教鐸烝候關而拜紫刃躍冰消血  
瀉管而愁紅金飛汁盡允符九十日之算遂成五千言之  
經斯以浴神藏蹟歧貞忒于千門虛道貽藉亂超沈于一  
袞矣教父神隱悟師指傳辛鉞奮迹于計籌尹喜遜精于  
樓觀禦寇蟬蛻于涓水蒙周龜曳于濠梁丈人詮道德之  
文伯陽協參同之契互爲軒挹未訖薰胥乃有東華上仙  
眞陽都散證璇源于地肺超金界于天心序換千齡塵驚

五季灑元和之法釀頓濯凡根恢大覺之眞筌甯沈恍惚  
用以道樞重鈕符再旦于茅封元鑄宏開叶分津于耨澤  
迴區南北各燿聲香南則銅柄颺歌金錢擘幻柏館毓悟  
眞之士杏林著還源之篇鐵馬奔瀛翠元有別宗之嗣玉  
蟾舒景紫賢留捷化之機遞降于彭漸同自鄧北則甘河  
拜呂渤海投譚庵結草而藏元馬推上座圖戲禽而化赤  
孫耀中闔至于披白鶴之書翹榮帝載拯紅羊之劫默度  
人羣繫七祖有長春迺全眞之極盛者也別有道成鳴鶴  
系託乘牛該洞輔而駢三演明威而衰一休哉固羽士之  
宗門飛仙之奧會若其祭酒之設頗招僞法之譏曾銷玉  
而無聞但祝脆而有請懺興于縣蘊道詘于泉租洎至魏

紀真君寇興上谷雷令霄書之後別創新科五光八塞而  
還更勇真法舍霞外之逸旨扇雲中之妙音靈幹非元繁  
條彌雜他若雨師服玉陶正餐魚馬醫留煎草之方繳父  
著噉花之法由茲代降千億其名阮倉之所未圖劉向之  
所失錄契援神而尙佚經證佛而猶疏又如朔憲珥筆于  
漢庭王葛徵文于晉籙陶居梁代杜挺唐餘張排甲乙之  
籤白擬丙丁之部莫不鋪豪而蕊馥授簡而星羅自餘諸  
家又將百種削干筠于東越莫罄元珠摧萬穎于中山焉  
窮丹鼎要厥長生之祕終歸正始之原雖復得仁真大抱  
珍太一徒資瑣瑣未箸超超兩派三宗若斯而已且夫做  
叨利之界者必垂積寶之梯筵宛轉之津者但覺挂星之

筏豈有昇元飛步惟屬于天真遺俗脩靈難成于仙業然  
而旁支頗曠左術恆多未就融肌俄嗟滅頂無異輦播車  
而求潔咀堇液以延年果欲罔墜宗風允貽世範則必審  
藍原之璧鑒邁鴟夷搜赤水之珍明儕象罔乃得程其正  
詭協彼中和故有摧禍車嗇大寶關無鍵而莫開營載魄  
而常衰挫其銳解其芬塞其兌杜其門冥冥默默橐籥固  
而天地息寂寂寥寥樞輪周而陰陽超亦馬亦龜一鴻一  
鹿守靜致虛斯爲道谷亦有欲新响故練臧適神堅牡鑰  
于元谷嗽靈漿于玉津劑澄泉之漢洑發天鼓之殷鞞不  
欲赫赫如日滄滄如月無緝茶茶無嚴卒卒胎逸烝于三  
華斂浮肌于一骨斯皆稅俗之瑠梁登真之玉訣也其次

則有芝菌遺方消摩奇術舒閱錄于中經鬯韜文于內策  
腹金鑑而遐征腰玉鑱而旁厯將欲排闥風涉瀛島舉太  
真之紅芝擷長河之文藻曾兔竹而非珍詎象柴而足寶  
符失甲而祿欺鍤橫辛而種杳空殘秣之催衰倏童顏而  
送槁亦有液白金鎔芽黃汞鍊鑪偃月以勤脩火凝陽以  
潛煽協道侶而三同注神功而九轉將使白虎爲驅蒼龍  
爲殿鳴雌鳩之泰和飛燕烏之偉辨鬼驟神趨文輝武綯  
雪聚慙英霜飛曳練絳闕翹情丹邱竦羨荒洗伐于全功  
倖超騰于乍咽亮貪鄙之未蠲豈華淫之能賤哉況乎圭  
黍俄餐而營魂遽變也然則功劣于菑禍隆于祐未儲得  
中之琴先揮斷生之斧彼外道與旁門更何當于齒數矣

故若鬢髻神娥虬鬚俠士袖掣蛇寒躡翻鹿駛刃去星愁  
光奔電死萬命懸威干常躍咫雖鶻逝而蠓潛特飛行之  
半體又如遁形練魄擲札飛符百靈烝燮萬化權孤甲將  
銅額丁神玉膚椎山駭破徙海愁枯卒詭道而罹咎亦真  
人之棄餘最下則陰道託于盤庚治術依于太乙鼓元素  
之調言術黃白之奧訣亦馳騫其紛如共沈淪而永畢豈  
待吉波戾術始乖警甲之真傳夷叔禘師方悖沈庚之舊  
迹矣哉於虜抗志中脩僅協品三之最馳情外助已衷得  
半之憂矧與轍而同傾必胥舟而及溺斯則鴻溝峻畫曾  
莫得而參差象緯均昭更無勞于允豫者矣是故宗枝之  
克紹謚聖之上源也軌躅之咸釐脩真之定範也源衍靈

而幾化則烝祖恆通範集道而凝神則仙途何遠固知簡  
青定錄字赤通虔異趣紛綸拱丹元而應念仙情洋溢充  
碧落而流因于是有羊苕仙洲龍羅祕境鳥能言而話月  
花有翼而飛春縹雲舒不夜之天翠水勒浮塵之烝千層  
貝闕組霞錦以成章四面瓊柯戛風琴而送韻是曰仙界  
以曠其神若乃紫館龍交丹房鶴駐浴新紅于朝景倒絢  
金臺膩澂綠于春泉輕翻玉雷風廊寂寂閒停冷石之基  
雲幕沈沈靜展柔豪之褥談清花散夢遠松涼是曰仙居  
以康其體且夫藻帶苔衣栖淵之妙飾星冠霓帔翫嶽之  
偉容香繖園客之蠶繡燦茅君之羽五銖緩曳方蟬翼而  
非輕十色交輝比鶴頭而何麗固使鍼神慝巧織女慙工



是曰仙章以標其采至乃堆花作膳蕪玉成菹飴分石髓  
之甘漿挹霞精之潤青餽出釜吹五里而聞香碧醞浮觴  
度千朝而閨醉豈特羊鬚上品遽療乎仙飢鴻脯嘉穀俄  
賓乎帝側是曰仙饌以養其和復有妙響飛空靈音透遠  
簧三舌而鳴夏瑛九烝而彈寒華石香鈞都非凡手颯詞  
霞曲俱雜仙心態擬春雲學鸞迴而慢舞讌張秋月妒鶯  
轉而嬌歌偶餘江上之聲長作人間之慕是曰仙樂以暢  
其倪復有九變之書八威之策五星通靈之印六甲降真  
之符秉玉鉞以伐邪源張曲蓋以游神寓植元竿以招六  
侍麾紫節以役千靈何況善積山中會天君而作禮太清  
座下屈雲帝而脩恭是曰仙儀以隆其度復有仙官奧治

里匠三千太帝靈司數逾二萬荷劔負書之客隨軒后而  
度龍沙擁旄佩璽之徒侍婉妘而停螭窟奚止東華玉女  
降木瀾以招真北燭瑤姬下蘭宮以奉使哉是曰仙從以  
供其役者也至於素虎輕輜斑龍逸輦磨隨豹引踴躍而  
下青霄風馭雲駟恍惚而翔元圃緱君笙斷控鶴背而長  
辭秦女簫和擘鳳毛而雙舉施存殘竹俄騰汝澤之波呼  
子神茆高翥漢中之月是曰仙駕以適其游者也然後瑩  
之以前知放之以散逸榮之以帝枋鑠之以神威品于日  
乎侔崇算于天平比壽方瞳乍曠碧海竭而搏桑寒游趾  
徐迴白雲起而蒼梧近蘇耽化去少已千年阮肇歸來甞  
猶十世諒何思而何慮亦無滅而無生豈不盛哉豈不盛

哉然而豫逸咸臻何關超悟之趣華榮徧述惟塵誘勸之資故下士所樂聞通才所滌耳也俗侶所動羨幽人所拂懷也矧夫委念真宗栖心上軌聚澗和而作友奉清淨而爲師謗辱不以扣其神粗陋不以攷其慮守定真之峻戒遵太上之嚴科又何豫逸之足休何華榮之足樂哉惟當挺極靈府飛英妙根刻浮情批佚志劉外道戲旁門屣丹藥之功腦元虛之祕爛七部以咀奧治羣真以鑄精奔軒正一之涂飛翺南北之派埏莊而埴列蹂尹而躋文揖龍聖以楷三清滌鴻蒙以臬泰始乃可爲抗元心于濁界絡墜迹于積年屹駭浪以忘驚緒叢熿而不眩耳至如穆滿荒游燕昭虛埃秦迷蓬闕漢惑殊庭魏徒赫其崇師唐屢

悌其委化宋承祖述黃籙彌崇明怛神威青詞稍著下此  
納凡身于苦海代構其迷煽妄說于元門世流其毒致使  
通人植髮志士穿齟騰繫風捕影之談持閹人鬼卒之論  
斥飛空爲螭魁詬遯蹟爲蝮獮崇之者適亂其真貶之者  
復淪其實儻曾泉而可墮忽暘谷而方超要之至道常凝  
元風莫闕楚失齊得未應奪我真詮畏障魔枝何足撓其  
神勇者哉斯觀創始焦仙再興陳子焦旣遠宗苦縣恢元  
寂之清脩陳亦近友回仙暢希夷之逸趣俄更四代已越  
千年頻昭輕舉之符罔墜積靈之緒若其勝流雨集道子  
雲來地卽華陰赴蒼槐而成市人非母野會紫府以如林  
頗復雜狼尾于屢豐之田溷魚目于積珍之藪李法師收

圭靈裔虞石真傳稟烝貨乎道樞度品登乎仙錄緘滕六  
性早悟自然之原翦伐三彭長苞無名之樸迺以初飛就  
晦扇削維時懼道義之乖方恆紆愁袞覬山靈之欽法長  
護貞居用劉元石之文永樹丹臺之範而淵懷遐注谷念  
無盈聳真契于恆流責元言于曲士可謂有虛心焉彊骨  
焉捷道微而不私啟神扃而非我者已某麤窺琅笈未喻  
琳文慙仲晦之叨祠原追擊壤擬相如之灑翰才絀凌雲  
將何以撫臬識于龍威索沈靈于鳳蘊然而窮鑽瓠石稍  
闕榛塗惟標貞確之筌盡削謬悠之牘源流略備衢劇紛  
羅於虜丹筆有靈黃冠此式賦金醪而頌美已讓桓先飾  
琳宇以揮詞恥居王後將冀元宗遞闡開萬劫而常新正

軌洪昭配三尊而永大于是銘曰

渾淪迴薄陰陽斡旋厥有元炁胚暉帝先無上能始強名  
乃傳剖奧同出凝精又元祕劫初開真文稍露樂聖恢權  
皇人佐度芬靈倪發少廣緱駐化化承源形形啟路風靡  
蠡椽俗謚鶉居其謹摻捉其動吁詒守樸凝一含瀆集虛  
胡靈胡載孰同孰殊洞啟天三城開景八紫赤恆輝元黃  
詎軋道體碑函仙才茹拔綠籍旣充清都道察華闕時會  
元洲下嬉蜺裳複杳龍駕逶迤萬化歸極千真協熙本無  
穢塞焉事芟夷珠囊道失玉鏡光晻員嶠塵侵曾城霧拚  
蝸鬥翹爭魚驚結慘靈紐全乖元綱疇寧炁孕渦曲精開  
斗宮獨尊驟定九步何雄赤縣遵軌紫微稟宗鬱儀天半

唐述河中蒼姬謝錄素王受命據籛東傳排關西競演駢  
辭徐乘光夢淨自茲阨靡危衰危盛帝醒已解庶發旋微  
浮水龍化繞山鵠飛鴈俄天塹燕忽王畿茫茫墜緒寂寂  
傾暉豈伊不神曰鍾與呂豈伊不顯爲眞爲祖欲絕還張  
將積更舉與極同維偕山比柱焚絲屢斷似玉翻多依貪  
闢徑導慾張羅妖彗欺月狂流濁河斯人已矣斯道如何  
伊誰矯矯克奮其烈遠派星探邪途雨別暢我靈機剖我  
眞鑄未就恆椿翻嗟濁涅矧茲神館依于介邱玉女漿挹  
奇童露求雲昇鳥去谷化蓮愁空餘靈蹟疇嗣眞游桓桓  
法師天錫懿寶琳札登名菌文煥表害馬都蠲眞龍非杳  
唐塾攸敷梁靈頓曉爰憑芝構益敞松壇虛堂納素傑閣

飛丹式建員石勇迴倒瀾靈宗遠紹逸軌旁刊鵠樹騰芳  
蟲雕掩陋配月長暉望風斯轉俱跂仙都同超俗囿屹此  
穹碑嶽楨齊壽



誥幽魄文

顧壽楨

季秋戒節日加庚午壽楨醉臥邸室夜四漏下殘夢微覺  
于時病葉鳴樹驚風灑窗有聲于廷時聞太息悽咽數四  
彌增慘怨悲哉無金石不敝之質焉問彭殤際薪火俱盡  
之時同隨霜露游神冥漠之野脫迹機網之外優游黃泉  
不其樂歟而乃繁霜慘魂頽煙鬱恨淒其零零此焉孤泣  
得非九京之下且有失途之士橫折之餘長鳴不平之憾  
不然何銜痛茹楚若斯之慘迫者也嗚呼厭生人之鞿局  
而息形于幽壤疲百歲之沈頓而弛負于一旦以爲有生  
之累自茲而釋孰知夫神理未盡尙有纏絲飄泊所遭奄  
成侘傺痛乎魂氣欲焉逃哉雖然死適死耳盡適盡耳方

當返聰明于太空混悲懼而焉寄胡又啾啾唧唧自爲慘  
毒無亦滯形骸于既化而不知合虛無于自然者乎然則  
我不自我爾亦安存生且不死死又何怨有若在几有香  
在鑪爾之知耶吾之悲耶嗚呼尙饗

沈竹虛亦廬詩序

王詒壽

彎彎流水花疏竹野之間宛宛書堂茶熟香清之候竹虛  
先生于是提挈鸚鷺夷猶琴畫拓雲霞之靈弢渺松石之  
幽趣秋月入戶滌古硯以露華春聲隔簾答林禽之風遞  
長歌塵外真人天際矣詒壽與先生忘年訂契彌日言驩  
款松風之關雙鶴迎屐酌花間之酒一蜨上衣瑤襟既諧  
瓊笈斯倒遂出示所著亦廬詩四卷臨風一歌亂墮珠玉  
口香三日如餐茯苓夫秋土工愁咸極鬱伊之思羈旅善  
感不無蕉萃之吟先生少嬰痼疾長謝纓綬種桑百株有  
田二頃資身裁給于世無求蕭園良書悅觀于曠且長統  
樂志安神乎閨房天籟自鳴清商間發寫南風之雅操谿

壑迴其春姿傲北山之白雲金碧謝其麗績無託怨悻之  
旨獨奏鏘洋之音飄乎欲仙淡而彌雋斯蓋存乎其人莫  
得而強也詒壽以單寒之身加之牢落飢來驅我鬼能笑  
人隱南郭之几仰天而噓跨東門之馬愁思忽至彩雲有  
日莫之感綠水興君子之嗟詩以言情歌惟當哭以視先  
生之雅抱沖襟良滋愧矣芸帙在手風琴忽聲刺船海上  
期成連之移情散髮山中讓孫登以獨嘯

王叔彝觀察詒安堂詩三集序

王詒壽

上海王叔彝觀察既刻其詒安堂詩初二集矣雲瓊千楮  
神丹九還積元圃之夜光樹芬林之特幟丙寅之春又集  
其十年之作爲三集來徵弁言羽聲忽起蒼涼燕趙之歌  
墨雨一揮紫彩魚龍之色有感而發每變益工愈唱愈高  
去天三尺蓋君以颯爽之英姿值倥偬之戎馬秋風戰伐  
中宵野哭之聲黑月關山萬里羽書之警江國之重圍屢  
合故園之喬木都非得毋盼金狼之燄夢繞矛頭聆櫪馬  
之嘶感生髀肉者乎無何霜袍叱馭墨騎提軍劔十萬以  
橫磨戰一日而再接雲中鐘鼓令嚴細柳之營帳下琵琶  
春滿蒲桃之酒雪夜草磨盾之檄秋城吹呼月之笳莫不

風雲壯懷蛇鳥變色及乎盜塚始剗漕轉宜時趙肅本洛陽主人礮石領海中專督銀濤萬疊神魚拜樓艦之旂金霞五更天雞叫扶桑之日是又奇雲怪霧盪其心胸北鯤東龍恢此眼界者也于是酒酣斫地浩歌寄懷撼風雨于齒牙馳雷霆于腕底擬漢家之朱鷺怒角爭鳴叱大壑之潛驪神珠入手龍虎百鍊鬱成宵練之光咳唾九天發此靈夔之吼且夫隨境造端者詩人之善變也情動言形者天真之莫掩也今者兼領茶綱言居蓬島荒蘆城郭官柳重栽小隊郊垆翳桑徧問遂啟琴觚之會時聯裙屐之歡梅花東閣非無水部之詩草木殘黎大有道州之詠藹然仁者穆如清風亦風人之旨矣詒壽掩關西枝之廬拾其

南山之豆野亭花好喜車騎之能來官舫燈紅渺雲山其

欲阻

時君奉檄攝陸州守將之官

載披瓊什有感瑤情語愧雕龍引慙

前馬明月千里結思在金沙翠嶂之閒白雪一編置君當  
玉局南湖而上

重修浦江仙華山竹林寺昭靈宮碑 王詒壽

若夫挹華嶺之玉漿明星祀古聆虞山之青羽虛洞雲寒  
天樂秋鳴金靄駐蒼梧之殿叢鈴夜語靈旂飄白石之祠  
女君仙子水畔停鸞玉蘭女郎江頭留鶴亦有周王貴主  
棲霞衍緜嶺之風唐室王姬金觀著青城之記莫不留霞  
居于勝地標雲構于人間況乎隆古上真聖王妙裔班參  
翠水籙受紫清如元修夫人者乎夫人黃帝軒轅氏之少  
女也擢穎瓊枝棲心琳簡方帝之在位也神靈御宇祕要  
參真蘭葉朱文圖迎五色青邱紫府道訪三皇鍊上藥于  
黃山元袞挹浮邱之袖受丹經于玉笈青龍駐王屋之車  
具茨登而鬼神朝靈臺建而天人合靈蘭著論早探性命



之微神芝餌精遂證長生之果是則娥宮視膳雲汲先嘗  
兌野承芬神符早佩金母降真之日分寶鏡之餘輝素娥  
駐節之年聆瑤絲之浩奏不必追飛蹤于風雨侶結赤松  
固已悟真訣于崆峒名書青札矣及乎寶鼎告成髯龍下  
逝黃雲已逝翠輦不迴遂脫網乎濁途用潛蹤于幽嶂仙  
華山者東浙名岨西崑別岫林翔白鳳仍同阿閣之禽洞  
闕紅芝卽作太真之館青泥煮石黃月凝蕤結三花之祕  
光拜九宸之帝命霓旌一去丹岑萬年蘊異氣于煙霞企

清芬于冰雪昔者勝國賢侯

須公

熙朝良令

毛公

景蹤靈軌結慕沖風始拓寶地于松關繼築

綠臺于蓮嶠如來金粟合仙佛爲一家玉女神林燦麟鸞

而五色旣號竹林之寺亦題昭靈之宮洞臺拜元君之眞  
社笛奏龍姑之曲蓋二百餘年于茲矣塵海逢災風輪轉  
劫金狼夜吼銅馬晨來戎燹旣經圯傾安免陰森敗壁時  
來拜月之狐蕭瑟秋林莫返駕颯之鶴暄肅屢易興葺久  
稽有心者恧焉則有譙國名流潁川魁彥周呼將伯首發  
宏施垂纓右族爭輸穴內之金積粟鼎門俱指困中之玉  
乃至蓬頭野豎亦效丹剛桂斧之勞珠祓閨英並來末利  
香纓之獻遂使朱檐冠斗繡戶生雲上界官府重開光碧  
之堂古佛道場無改紺林之舊以彼叢祠著柳芳觀呼梅  
楚江廟內桃花亦號夫人鍾陵山中甲帳猶居仙子幻生  
綺夢荒等巫雲雖錦締之增華方靈微而滋愧況乎金銀

舊闕桑海新經神車所臨慧佑彌仰椒漿合霧桂奠趨風  
寶幢鸞繡香圍帝女之花祝鼓夔鳴音答梵天之唄肅百  
靈而永衛合萬戶以同瞻詒壽往以冷曹曾趨山殿今聞  
盛事倍慕宏風遙想層城開丹苑白環之境慙無鐮骨誦  
流珠玉佩之經磨片石于重巖酬眾言于往諾傳夢中之  
綵筆敢承青版以摛詞聽天際之瑤笙願拜綠金而受簡  
銘曰

冥冥元橐寂寂靈囊疇悟道妙粵若古皇鼎湖一去攀龍  
勿及遺此王姬皜皜玉質仙華之峯白雲高寒服食鍊氣  
合我神丹神丹既成羽軒上征留微瓊谷飛真玉清龍嵒  
穹宇颯沓靈衛獻荔陳蕉二百餘載游光夜嘯妖火來燔

豈不呵護曰有數存畫龍四壁雕螭萬礎惜此霞都半委  
煙莽爰選材木爰召工師虹廊鳳閣金碧重施寶掌豎右  
藥壺峙左林迴鐘迴花深幢鏤鴛藍金敞獅座香籠是惟  
法界卽在閩風肅瞻仙居敬念隆緝亭苔縹緲瑤宮之則  
在山之顛在谿之澗千秋勿蝕一片貞珉

答施均父書

王詒壽

均父足下河梁攜手曾賦五言耀靈振轡倏彌一載秋閒  
松谿歸述足下拂衣出都萬里西邁保陽遭負匱之盜太  
行墜再蹶之馬毅然長征不復返顧豪邁之氣聞之神王  
旣念孤蹤關寨冒犯霜露登樓引領復用悵結歲聿云暮  
始得十月十日皋蘭書發函伸紙迴環三復鋒振詞舉有  
同抵掌夫豐城劍氣待茂先而始騰雒陽玉檢遇子伯而  
增寶足下之見器于相國宜也足下習虎鈴之經抱龍驤  
之志以枕戈之越石依當代之夷吾誠神鯨得雷雨駿足  
步風雲之時虎牙建節燕領封侯烈士壯猷固無多讓然  
必謂功名當如班超陳湯而以一郡一邑爲未屑僕竊以

謂過矣夫守郡者股肱之任臨邑者政化之基宣帝有言  
惟良二千石共治漢官之制掌一萬戶上爲令興剔仰施  
黎元繫命故古者郡邑良吏類有公輔之器將帥之資或  
赤丸變起黑山寇來則且提枹展旂揚武定旤其黠績丹  
常熠氏青簡者蓋比比也僕願足下韜鉞櫝彩和光葆貞  
循資以求隨分而處勿舍夷途而趨險軌勿棄近績而夸  
遠功此則萬里故人所殷殷進規者耳數月以來松谿赴  
江右藍洲赴荆門仲脩赴皖南並以長才騁于王路僕冷  
螢無燄老蠹同餐側身四顧彌悵寥落良朋星散薄俗雲  
浮如何如何海濱騷動幸已銷烽天台之變乃由征賦弄  
潢池之兵無非赤子聚南山之盜尙是白徒誠得賢長官

善處之當無慮耳朔風凜然聽園梅開巡檐孤嘯懷我知  
己邊地苦寒雪厚幾許伏冀眠餐倍萬珍重

書熊廷弼傳後

徐錦

余讀明史至熹宗時而遼東之不可爲決矣成梁之撤土堡壤地錯於犬牙邊鎬之喪軍貲鎧仗高於熊耳求其持重老成洞明形勢孫承宗而外廷弼一人而已而乃朝賜環於魏闕誓聽王猛之謀夕褫帶於狴牢憤下臯陶之拜飛霜刑市齒劒天庭何哉蓋其時奄禍陰埋搢紳朋比青紫鬪於朝元黃混於野而公以十年故將新歸李廣之封以特立孤臣思請朱雲之劒自經撫不和而張鶴鳴輩皆其敵矣然猶乞百劄空名倉皇募士建三方節制慷慨籌邊屯關而令肅穆貅扼險而辨嚴蛇鳥其與化貞共事也一則充國知兵聯屬夷爲固守一則姜維輕戰出九伐以



無功而爲閣臣者復內存忤刻之心外挾調停之見公於是乎殿前論事知節聲高私第愁居李晟目腫矣議者謂賈生詆絳灌而後世少之郭令交朝恩而當時躋之公方身倚安危志存恢廓何乃生惟嫚罵務爭勝乎柄臣死尙追賊更株連夫賢士謂非憇乎不知醜正有徒如弦死道邪蒿豈種之當路勁草正顯於疾風雖寇萊公臥護兵符北門任重而皇甫規無名黨籍壯士何顏廷弼之獄逆黨借以傾楊左諸公也碧血縱埋丹心不泯使必自貶丰采先交要路之驩大挫鋒棱免掣英雄之肘瓦全可唾尺枉貽羞公屑爲之哉所可惜者抱經世之才膺干城之任九方威望羣驚光弼旌旗萬里使臣爭問武侯眠食與其終

填牢戶羅鐘室之橫災曷若決命沙場酬靴刀之壯志化  
貞之敗平陽橋也公自當死拒耳奈何軍容早墨邊騎俱  
奔車中則薏苡生讒閫外則芻糧盡散成岳侯之寃獄故  
卒心傷行袁尙之頭顱窮邊痛哭屬鏤了之長城壞矣雖  
然做箪不救鹽池隻手難支大厦公之志亦惟鞠躬盡瘁  
而已卒之東市朝衣孤忠孰亮平原兵解佚事猶疑君子  
觀焚香藤枕之說而轉嘆承宗之死爲不可及矣

與張玉珊書

徐錦

玉珊足下握別半載結轡寸衷剎那轉瞬易裘而葛槐爽  
入箠梅薰泛絃延想沖襟亮無虧攝久闊疏麻輒感離索  
吳雲燕樹我懷如何遠念足下佐治名邦問字酒清不疏  
箋贄退衙鼓早飫聆琚談風座哦晨雪瓊擁夕篋搜蠹粉  
蓮幕鈔書筆颯蠶聲薤牋疊韻箸饌之富亮復斐然往者  
閒居相攜過從一簾花雨偕鏖棋兵半銜藥煙或浴禪悅  
籌糾酒政笙煮茶香閒琢麗句同識樞心偶佐清談分數  
栗典旣而團雪不留閒雲各散波程百織山郵孤懸跡逐  
鴻飛心與鷗素仵顏貢苑軫別翹慙君唱依人我歌行路  
乾牋同慨煙墨爲愁匳拋紅豆拈曲懷人葉悴青衫賣文

送日螢枯罕耀蟬老將乾君既伊鬱僕又百之禮闈報罷  
愈益無聊研墨磨歲哦詩煤窮咄咄書空區區斬我琴書  
話舊絕妙朋歡米鹽累人兼逋藥債歲月易得文章不靈  
攬鏡自照容色欲悴塞北花稀春去無跡江東米盡價貴  
如珠蒟苦在中欖回已緩寸管作健本非初心一第後人  
何況千古蓮舫入都銳藻道絕文戰忽北改轍遂東走也  
于于浪迹燕市一擊不中未能善刀珍篋遷書凝塵襴刺  
此行不樂來日大難旅邸枯坐間若僧院樹影當檻圓蓋  
吟肩車聲過巷碎碾晨夢一鵲警睡窗猶未明萬蠅繞几  
扇不能敵旣歌偈仄復苦炎歊日氣蒸瓦破屋如然風勢  
驕沙深牖忽暝鴛湖煙柳憶如天上舊雨落落星散南北

天生我輩當有位置自顧此身又非抗俗結願匪奢亮所  
察喻天人對策不負夙學科名入手持以壽親便賦家居  
旁揆山趣課兒讀書教婢丸藥蠟屐幾兩資之聽鶯買田  
十雙餘以飽鶴朋攜季重選勝南皮傳讀桓譚著書西笑  
擘經署館補史築亭無魚之缺侯門免彈有蟹之州寓公  
亦可結懷莫遂如何如何涼蟾窺人桂芬如動稍緩竿頭  
且學睂樣故人贈語如斯而已勉謀加餐厚蓄靈彩鯉魚  
風便幸惠答我

周存伯范湖草堂圖序

徐錦

吾禾爲煙水之鄉林激盤互菰蔣纏連雲樹弄其虛濤鰕  
菜飽其秋味柴門臨水清吸湖光古寺催鐘暝入艣響壁  
開畫竹點雙鷺以嬉晴歌斷采菱吐一蟾以媚夕幽負之  
致尤萃范湖園依倦圃爲鄰坊問金陀之舊此周君存伯  
草堂圖所爲作也存伯雲幘雅望霜瑄清微抽虎僕以從  
戎呼龍泉爲知我夜帳添燈醉草羊皮之檄寒裝倚劔催  
成馬背之詩薦牘風行得州斗大然而中年逸少早傳誓  
墓之文作賦興公大有遂初之想飲神漢而仙池換骨宅  
福地而銀榜鐫名棲影葭蒼盟心瀟碧蓋腰縮墨綬輒多  
簿書之勞坐對青琴乃有嘯傲之樂於是借蒙叟寓言繪

輞川別墅田分鶴料水課鰕租青鞋之約預辦夫他年白  
社之歡兼招夫野老闢此數十弓釐爲十九景荷瀨延爽  
抱鷗夢而露吟蘋香薦涼配魚餐而星酌換頭弄笛吹墮  
雲外之聲聳肩倚闌逋到涼邊之句披其圖者渺然有江  
鄉之思焉雖然署蠻府之參軍大都作郡著歸田之小錄  
幾箇還山油幕舊而燕寒蕙帳空而鶴怨正恐文虛招隱  
堂冷挂瓢夢中之蠟屐常乾畫裏之青山亦老及取其詞  
讀之則又看雲眷舊聽雨思鄉賀監狂吟終抱乞湖之願  
杜陵茅屋常存廣廈之懷傍春澗而哦松做秋簾而觴芰  
風月而外占水竹者二分詩酒之福下神仙者一等小園  
枯樹蘭成之賦銷魂禪榻茶煙杜牧之鬢欲雪信乎越人

思越不徒秋士悲秋矣僕家傍鴛湖萍飄燕市歌闌燭爍  
枯參米汁之禪曉角清霜冷結春明之夢悵買山之錢少  
拾芳草而愁多瀏覽斯圖同茲棖觸所盼傳成循吏堂築  
退思邀琴鶴而扁舟戀菹鱸之一箸君則按蕢洲之曲我  
亦歌竹屋之詞相與流連月話樵績煙姿請以此言爲息  
壤可乎



陳圓圓小影圖序

徐錦

夫椰酒酸斟水月供崔徽之像楊枝甘滴畫圖還倩女之  
魂衡嶽非遙呼綵灰而百日湘煙欲溼夏珊珊佩於雙清莫  
不渦暈修蛾情癡賦蝶若乃以嫫媿之弱質關興廢於天  
家別館笙寒繪出靈犀夙慧戰場花豔尙煩細馬馱歸如  
陳圓圓者亦恨海所難淘情天所永闕者乎想其芳姿印  
月朗悟成珠仙謫瑤宮字豔薛濤之紙名傾錢市浣餘西  
子之紗搗來傅粉通侯南山射虎約訪麗春妙妓北里停  
驄檻早移春雲先離峽未被入宮之寵一顧城傾恐留如  
海之門三生石老豈知丁簾奏伎甲第開筵乃有平西伯  
吳三桂者竟諧紅拂之緣遽有紫雲之請也品花戚里步

障霞明蓐食軍門牙璋火速鳴鴟箭而防秋舉狼烽以警  
夕雖豔稱臣里東牆窺玉有年奈師誓將壇北門非準不  
可於是花種將離詞催錄別賊橫至此雄關已倒於靴尖  
吾老是鄉綺陌罷迎夫繡幃極目盧龍塞北望遠有情傷  
心丹鳳城南含愁不見流黃新樣泣舞院之幽蟾慘綠年  
華盼郎君之行馬淚釀桃花之醋鏡臉將潮膚寒柿蒂之  
綾密香欲散未幾而當關虎豹戍已空屯食人魚羊甲申  
應讖十八子兵鋒彗掃瑤闕成墟三百年廟社灰寒鼎湖  
流涕貴主銜悲於飲刃後宮永訣於攀髯斯時也飛矢射  
門括錢按籍哀絲豪竹綠蠟雙輝舞扇歌裙紅羊一劫碎  
銀筭於么柱魂隨茵溷同飄呼絳樹於雕闌膽與家山俱

破強質蕭同鄰國遽留呂后營中斯則瓊箔蠶枯柔絲未  
盡銀雲蛾殞芳信同灰者矣嗟乎草間乞活豈獨青娥間  
外復讐偏憐碧玉未爲君親而殺賊獨緣窈窕以興戎於  
是收燼長安還珠合浦雲磨鎧仗大宛國汗血三千花簇  
鈿車小喜字連環卅六訴從頭之家難渡從仙鵲之橋建  
討逆之高牙誓斬佛狸之使藁砧何在歡歌得寶之秋斗  
帳相攜泣怨背鎧之夕然而紅顏憔悴未老楚宮白紵飄  
零免嗟末路夫婿則東方千騎已畫麒麟藩封則南面百  
城坐雄螭獠不學莫愁湖畔院本爭傳儼從織女石邊機  
絲重認屹然方面講韜略於旗門暇則畫眉消光陰於戟  
寢狔鳥蠻花而外檀篆心縈碧雞金馬之間夢華掌錄何

意陰謀潛蓄反狀漸彰盃血授公祐之頭鞭月揖吳曦之影圓圓獨智珠能照慧鑑常清甘爲入道之宮人不待閉門之天子十年夢覺結來香火因緣一笑花拈換出綺羅名姓圓圓史稱陳沅而當日府中稱邢夫人或曰本姓邢鴿王下偈悟空玉女之瀾螺髻不春願祝金仙之髮以視別騅慷慨垓下殉生羅獵倉皇晉陽同陷亦云幸矣今則山巒北拱事業東流瞰雲之妝閣何存華國之寺門久圯宋翔鳳圓圓小像記雲南府城五華山有延陵故王宮址西有華國寺寺有樓相傳圓圓妝閣而此圖也霽彩中天瑤儀終古鬆鬢莫帳現寶相於鸞容補黛茜羅活手姿於麝墨說褚公則旁人齒冷譜李師而才士情移平添桃葉情波香魂欲出好繼煤村詩史鏤管重飛

國朝駢體正宗續編卷七

受業高安鄒凌瀚校